

Newsletter

Autoriteti i Konkurrencës gjatë muajve Tetor-Dhjetor 2023 ka marrë 25 vendime:

- **Marrëveshje të ndaluara:** 1 vendim;
- **Abuzim me pozitën dominuese:** 2 vendime;
- **Përqendrim:** 17 vendime;
- **Rekomandim:** 1 vendim;
- **Akte Nënligjore:** 2 vendime;
- **Vendime të tjera:** 2 vendime.



Ndër vendimet më të rëndësishme mund të përmendim:

1

Hapje e procedurës së hetimit të thelluar

Hapja e procedurës së hetimit të thelluar në tregun e prokurimit publik.

Komisioni i Konkurrencës, mori në shqyrtim raportin e hetimit paraprak në tregun e prokurimit publik ndaj ndërmarrjeve Raimondo G.P SHPK dhe Li.Bo – Albania Branch SHPK.

Gjatë vlerësimit të sjelljes së ndërmarrjeve u vu re se, ndërmarrjet mund të përdorin skemën e ofertës së mbuluar duke rënë dakord që njëri nga konkurrentët të paraqesë një ofertë e cila përmban terma specifike të cilat janë të papranueshme nga autoriteti kontraktues.

Si përfundim, bazuar në nenin 4, pika 1, të Ligjit nr. 9121, datë 28.07.2003, “Për mbrojtjen e konkurrencës”, sipas të cilit ndalohen të gjitha marrëveshjet, që kanë si objekt, ose si pasojë pengimin, kufizimin ose shtrembërimin e konkurrencës në treg, si dhe Udhëzimin “Mbi luftimin e marrëveshjeve të ndaluara në oferta në prokurimet publike”, sjellja e ndërmarrjeve: Raimondo G.P SHPK dhe Li.Bo – Albania Branch SHPK, në tregun e prokurimit me objekt “Blerje pajisje instrumente, vegla elektrike dhe digjitale (pajisje për kontrollin dhe matjen e mbrojtjes katodike CIPS dhe DCVG)”, të zhvilluara nga autoriteti kontraktues, Albanian Gas Services Company SHA, hedh dyshime për kufizime të mundshme të konkurrencës nëpërmjet një marrëveshjeje të dyshimtë në oferta midis tyre.

Për këto arsye, Komisioni i Konkurrencës me Vendimin nr. 1026, datë 26.10.2023, vendosi hapjen e procedurës së hetimit të thelluar në tregun e prokurimit publik ndaj ndërmarrjeve Raimondo G.P SHPK dhe Li.Bo – Albania Branch SHPK. Hetimi i thelluar do të përfshijë periudhën kohore nga 26 Shtator 2022 deri në 26 Tetor 2023.

2

Hapje e procedurës së hetimit të thelluar

Hapja e procedurës së hetimit të thelluar ndaj ndërmarrjeve Erzeni SHPK, Gjiofarma SHA, ADG SHPK (Lufra), SHAKA Boboshticë SHPK, në tregun e prodhimit dhe tregtimit me shumicë të nënprodukteve të qumështit.

Komisioni i Konkurrencës mori në shqyrtim procedurën hetimore ndaj ndërmarrjeve Erzeni SHPK, Gjiofarma SHA, ADG SHPK (Lufra), SHAKA Boboshticë SHPK në tregun e prodhimit dhe tregtimit me shumicë të nënprodukteve të qumështit (djathë dhe gjalpë).

Referuar analizës së tregut të prodhimit dhe shitjes me shumicë të nënprodukteve të qumështit, rezulton se sjellja e ndërmarrjeve me pjesë të konsiderueshme tregu, Erzeni SHPK, Gjiofarma SHA, ADG SHPK (Lufra), SHAKA Boboshticë SHPK, mund të përbëjë abuzim me pozitë dominuese sipas nenit 9 të ligjit nr. 9121/2003.

Për këto arsye, Komisioni i Konkurrencës me Vendimin nr. 1045, datë 29.12.2023, vendosi hapjen e procedurës së hetimit të thelluar ndaj ndërmarrjeve Erzeni SHPK, Gjiofarma SHA, ADG SHPK (Lufra), SHAKA Boboshticë SHPK, në tregun e prodhimit dhe tregtimit me shumicë të nënprodukteve të qumështit.

Hetimi i thelluar do të përfshijë periudhën kohore nga 1 janar 2022 – 31 dhjetor 2023.

3

Përqendrim

Rasti i njoftimit të përqendrimit të realizuar nëpërmjet përfutimit të kontrollit të përbashkët të shoqërisë FIER Thermoelectric SHA nga shoqëritë DEPA Commercial S.A., GEK TERNA S.A. dhe GENER 2 SHPK.

Komisioni i Konkurrencës mori në shqyrtim njoftimin e përqendrimit të realizuar nëpërmjet përfutimit të kontrollit të përbashkët të shoqërisë FIER Thermoelectric SHA nga shoqëritë DEPA Commercial S.A., GEK TERNA S.A. dhe GENER 2 SHPK.

Ky përqendrim nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë ndryshim dhe nuk do të ketë ndikim në tregun shqiptar.

Për këto arsye, Komisioni i Konkurrencës me Vendimin nr. 1044, datë 29.12.2023, vendosi të autorizojë përqendrimit të realizuar nëpërmjet përfutimit të kontrollit të përbashkët të shoqërisë FIER Thermoelectric SHA nga shoqëritë DEPA Commercial S.A., GEK TERNA S.A. dhe GENER 2 SHPK.



Aktivitete



Eventi me i rëndësishëm i vitit 2023 ishte Konferenca Ndërkombëtare me temë “20-vjetori i ligjit “Për mbrojtjen e konkurrencës” në Shqipëri: Pavarësia dhe roli i autoritetit në reformën rregullatore, zbatimi i ligjit, advokacia dhe sfidat drejt Integritimit në Bashkimin Evropian” e cila u zhvillua në datat 23 dhe 24 nëntor 2023.

Në kuadër të promovimit të kulturës së konkurrencës dhe 20 vjetorit të rrugëtimit të Shqipërisë në mbrojtje të konkurrencës së lirë dhe efektive në treg, kjo konferencë mbledhi së bashku ekspertë të autoriteteve homologe nga rajoni dhe Evropa; përfaqësues nga pushteti legjislativ, ekzekutiv dhe gjyqësor; organet rregullatore, përfaqësues nga dhomat e tregtisë, si dhe pjesëmarrës nga bota akademike dhe e biznesit.

Konferenca u përshendet nga Kryetari i Autoritetit të Konkurrencës, Z. Denar Biba; Kryetari i Komisionit të Ekonomisë dhe Financave, Z. Eduard Shalësi; Guvernatori i Bankës së Shqipërisë, Z. Gent Sejko; Përfaqësuesi i UNDP në Shqipëri, Z. Francisco Roquette dhe Zëvendës Ambasadori i Gjermanisë në Shqipëri, Z. Thilo Schroeder.

Gjithashtu u zhvilluan diskutime të hapura në panele me tema si pavarësia e institucionit dhe roli i tij në reformën rregullatore, sfidat drejt integritimit në Bashkimin Evropian, bashkëpunimi ndërkombëtar dhe zbatimi i ligjit të konkurrencës: antitrust dhe përqendrimet.

Në seksionin e fundit dhe fjalën e tij përmbyllëse, Kryetari i Autoritetit të Konkurrencës Z. Denar Biba, pasi falenderoi bashkë organizatorët e konferencës UNDP dhe GIZ, vuri theksin në rëndësinë e bashkëpunimit me homologët ndërkombëtarë, si dhe falenderoi të gjithë pjesëmarrësit dhe të ftuarit nga rajoni dhe Evropa për kontributin e dhënë në këtë konferencë, duke finalizuar me sukses 20 vjetorin e ligjit “Për mbrojtjen e konkurrencës”.





Aktivitete



AK ka vijuar gjithashtu dhe bashkëpunimin me botën akademike duke zhvilluar më datë 14.12.2023, në ambientet e Fakultetit të Drejtësisë, Workshop-in me temë “Promovimi i mëtejshëm i kulturës së konkurrencës me botën akademike” në bashkëpunim me Universitetin e Tiranës, me pjesëmarrjen e Kryetarit të Autoritetit të Konkurrencës, Z. Denar Biba, përfaqësues të AK, profesorë dhe studentë në fushën e drejtësisë dhe ekonomisë.

Këto workshop-e dhe takime informative/edukuese do të vijojnë të organizohen nga Autoriteti i Konkurrencës jo vetëm në kuadër të sugjerimeve të Rezolutës së Kuvendit të Shqipërisë, “Për vlerësimin e veprimtarisë së Autoritetit të Konkurrencës për vitin 2022”, por edhe si mision që autoriteti i ka vendosur vetes për promovimin e mëtejshëm të kulturës së konkurrencës përmes intensifikimit të marrëdhënieve me botën akademike për çështjet e rregullimit të tregut.

Aktivitet me botën akademike



Aktivitet me botën e biznesit

Në vijim të bashkëpunimit me botën e biznesit në datën 19 dhjetor 2023 u zhvillua takimi me përfaqësues nga Shoqata Biznesi dhe Dhoma Tregtie me temë “Korniza legjislative/ligjore për mbrojtjen e konkurrencës dhe nevoja për një rol më aktiv të Autoritetit të Konkurrencës në fushën e biznesit”.

Në këtë organizim morën pjesë përfaqësues nga dhomat e tregtisë, si ajo shqiptare, gjermane, amerikane etj, zyra ligjore dhe biznese të interesuara për njohjen më në detaje të legjislacionit mbi mbrojtjen e konkurrencës në Shqipëri.

Aktivitete të tilla do të vijojnë të zhvillohen dhe vitin pasardhës, si një traditë e AK për të lidhur ura komunikimi me grupet e interesit, me qëllim njohjen dhe promovimin e kulturës së konkurrencës.

